

Daxgoeng Gou

我的爷爷

德保县隆桑中心校四年级 陆丽婷



Daxgoeng gou gaenq ndaej 60 lai bi lo, naj nyaeuqnyatnyat, hoeng ndang lij gig maengh, ga hung lingzvued, byaij loh hwnjdaej yiengj “dungdung”. Geij bi neix, vunz mbanjranz saedcej gvaq ndaej lumj lwgraz haiva—hohhoh sang. Hoeng daxgoeng lij mbouj youq—hoengq. De youq ndaw reih naj ranz laeng ranz ndaem rim byaek, lij ciengzciengz dawz daengz gwnz cin bae gai.

Gou youq ndaw cin doegsaw, mbouj gingciengz dauq ranzgaeuq, hoeng ciengzseiz dingq daxboh daxmeh gangj: “Daxboh caen hix dwg, nienzgeij baenzneix geq, mbouj you gwn mbouj you daenj, lij nyaengq dwk mbouj dingz……”

Bi' gvaq sujyay, gou dauqbae ranz daxgoeng youq guhcaemz. Banhaemh, gou yawjraen daxgoeng rap rap byaek ndeu dauqma, sawqmwh gietdingh, ngoenzcog aeu caeuq daxgoeng itheij bae gai byaek, hoeng mbouj naeuz hawj daxgoeng rox, cij naeuz hawj daegnuengx rox, hawj de caeuq gou itheij bae, daegnuengx dapwnq lo.

Ngoenz daihngaih, mbwn ngamq yaek rongh, gou caeuq daegnuengx laeglemx hwnq lo. Diem din diem fwnq hai dou rug daxgoeng, cijraen daxbuz gag ninz gwnz mbonq. Gou caeuq daegnuengx laihnaeuz daxgoeng lij youq gyanghongh guh gijmaz, ngamq doi hai dou, couh dingqnyai aen mohdozceh daxgoeng yiengj lo, gou caeuq daegnuengx vaiq buet okbae naeuz: “Daxgoeng, dou hix bae.” Daxgoeng geizheih dwk cam: “Bae gizlawz?” “Caeuq mwngz bae gwnz haw gai byaek ya!” Daxgoeng sing hung riu naeuz: “Lwg huk, byaek gai liux lo, gou gaenq dauqma lo. Yawj gou lij daiq gij huq ndeigwn ma hawj sou ne!” “A!” Gou caeuq daegnuengx doeksaet dwk bak ajloengloeng.

Gwn sat haexcaeux, daxgoeng youh gwed gvak bae guh hong lo……

Daj haenx hwnj, gou dauqma daengz ranz couh gaenx lumj daxgoeng ityiengh, ciengz bang daxboh daxmeh guhhong, daxboh daxmeh cungj haenh gou gyaenz guhhong lo.

Gij Maij Daxmeh Lumj Haij

母爱似海

上林县大丰镇皇周小学四年级一班 蓝 帆

Daxmeh gou soqlaiz caengz guh gvaq gij saeh hung haenx, dauq hawj gou gamjsouh daengz de gig maij gou.

Ngoenz ndeu gyanghaemh, gou mbouj siusim najbyak deng bungz ok lwed lo. Daxmeh raen le, lienzmuengz umj gou buet bae yihyen. Gou heuh daxmeh cuengq gou roengzdaej, hoeng daxmeh dauq naeuz: “Mboujyung, mboujyung, yaek daengz yihyen lo!” Mbouj rox seizlawz, gou fatyienh daxmeh loh din, laj din lae ok gij doxgaiq saekhoengz, haenx dwg gijmaz ne? Gou sijsaeq baez yawj, a! Haenx dwg gij lwed daxmeh! Yenzlaiz, daxmeh sim gip lai lij caengz daenj haiz, couh umj gou buet okdaej lo. Gij rin gwnz loh camx din daxmeh ok lwed lo.

Miz baez ndeu langhhag seiz, sawqmwh doek fwnhung, ngoenzhaenx gou mbouj daiq liengj, cijndaej caj fwn dingz le caiq baema. Youq ndaw fwn, gou

yawjraen aen ngauez ndeu byaij daej coh gou, “A! Dwg daxmeh!” Gou angq hwnjdaej lo. Daxmeh byaij daengz baihnaj gou, riunyumnyum dwk naeuz: “Lumz daiq liengj loba! Baezlaeng mboujndaej lujlaj lo.” Youq gwnz loh, daxmeh cungj gang liengj hawj gou, ciheij dauq deng fwn rwd dumz lo. Yienghneix, gou doiq daxmeh naeuz: “Daxmeh, mwngz gaem liengj gang baih mwngz ba! Buhvaq mwngz cungj dumz lo!” Daxmeh unqswnh dwk naeuz: “Mboujmiz gijmaz! Neix mbouj suengq gijmaz……” Ma daengz ranz, buhvaq, byoemgyaeuq daxmeh cungj dumz lo.

Dwg ha! “Gij maij daxboh lumj bya, gij maij daxmeh lumj haij!” Gij maij daxmeh lumj haijyangz mbouj miz haenz, geijlai gvangqlangh! Geijlai raeurub! Gij maij daxmeh couh lumj raq rumz raeurub, menhmenh lumh faj naj gou!

(指导老师: 刘海蕙)

Haj Maenz Ngaenz

五元钱

贵港市覃塘区蒙公乡高占小学五年级 李敏娇

Miz gienh saeh ndeu, gou ciengxlwenx lumz mbouj ndaej.

Haenx dwg gou hwnj sam nienzgaep seiz, bakdou hagdangz cungj miz hauilai dan gai saejdaeuz. Moix baez hauejok bakdou hagdangz, dingqnyai sing bouxbuenq hemqgai, yawjraen doengzhag daengx fwnqz gaem rim saejdaeuz, ndaw ukgyaeuq gou naemjyeb.

Ngoenz he, gou swnh daxmeh mbouj youq ranz, daj ndaw daizdo de caeg 5 maenz ngaenz daej. “Caeg” cih neix baez daih' it yungh youq gwnz ndang gou lo, cijdwg vih cawx saejdaeuz. Cuengqhag le, gou cawx hauilai saejdaeuz, cingq byangh' aek gwn seiz, gou sim mbouj an' onj hwnjdaej. Danghnaeuz daxmeh fatyienh gou gwn saejdaeuz baenzlawz banh ne? Gou wnggai mbouj wnggai nyinh loek ne? Gij vwndiz neix youq ndaw uk gou cienq bae cienq dauq, gwn doxgaiq hix mbouj miz feihdauh lo.

Doxgaiq cungjsuenq gwn sat lo, gou uet bak seuq bae, baez yamq baez yamq byaij baema. Baez hauej ranz, couh yawjraen daxmeh cingq fan ra gijmaz. Seizneix, daxmeh yawjraen gou dauqma le, couh cam: “Mwngz yawjraen 5 maenz ngaenz gou lwi? Gou ra lingzcienz bae cawx bau gyu ndeu ne!” “Mbouj, gou mbouj raen.” Mbwn ha, gou vihmaz aeu yienghneix gangj vahgyaj ne? Gou gangj sat couh buet ma aen rug swheij lo.

Daengx hwnz, gou deng gienh saeh neix loengh dwk ninz mbouj onj. Henz dujrwz lumj miz song boux vunz doxceng: “Mwngz wnggai bae yiengq daxmeh nyinh loek.” “Mbouj, yienghneix deng lemh rim ndang bw.” “Byawz heuh mwngz damgwn, gag guh gag souh.” “Hoeng……”



Mbwn baez rongh, gou couh roengz gietsim bae ra daxmeh gangj cingcuj aen saeh neix. Gou laihnaeuz daxmeh rox le, itdingh lemh gou rim ndang bae. Sojyij, gou dinghdingh caj “rumzhaenq fwnraq” daejdaengz. Siengj mbouj daengz, daxmeh cix riunyumj doiq gou naeuz: “Guh loek saeh le, gamj gag nyinh loek, couh dwg boux lwgnyez ndei, baezlaeng mbouj ndaej caiq famh cungj loek neix lo.”

5 maenz ngaenz hawj gou bienqbaenz “bouxcaeg iq”, hoeng gou gag nyinh loek ndaej daengz daxmeh yienzliengh, ndawsim gou ndaej soeng di lo. Lumj cungj loek neix, baezlaeng gou itdingh mbouj caiq famh lo. Gienh saeh neix hawj gou rox: Bouxvunz mbouj gojnaengz mbouj famh loek. Guh loek saeh mbouj dwglau, dwglau dwg guh loek saeh le cix mbouj gamj gaijcingq gvaqdaej!

(指导老师: 覃珍团)

Doengzhag Gou

我的同学

武鸣县仙湖镇中桥小学二(3)班 潘姿纯



Ndaw ban gou miz boux doengzhag ndeu heuh Banh Vaz-

gyangz, bineix ndaej bet bi, goet iq, daeq gyauejbingz, naj luenz, laj ndaeng sang de miz faj bak hung ndeu. De gig gyaenz “cejdaihbaeuq”, ndigah couh ndaej aen vamingz “daihbaeuqvungz”. Baez roengzdangz, de cungjdwg caeuq doengzhag naeuz neix naeuz haenx. Miz mbat he, de naeuz: “Gou bae gvaq aen deihsueng he, aen deihsueng haenx cij caen heuh nit ne! Sou rox miz geijlai doh lwi? Lingzya 50 doh, feiz cungj ngaiz giet lo, baenzlawz boq hix boq mbouj ndaep.” Daihgya dingq le cungj geizheih dwk hemq hwnjdaej. Miz boux doengzhag naeuz “Cejdaihbaeuq!” Banh Vazgyangz naeuz: “Yaeuh mwngz dwg malwg!” Gij saenzcingz lij caen hawj vunz buenq saenq buenq ngeiz ne.

Gyoengqsou gaej yawj de baenzneix gyaenz cejdaihbaeuq, de raen lai rox lai, lij gig gvai ne. Gij daezhoj lauxsae ok haenx cungjdwg de sien siengjdaengz, gyoengqraeuz lij caen gig boiqfug de.

(指导老师: 黄雪丽)